

15 - ATV LO CUMINZA OPERA NA VERANO 1996

ORANJESTAD (AAN): Aruba Broadcasting Company NV, esta "15ATV" a firma un contract cu e cadena di television Mericano, National Broadcasting Company (NBC) cu lo permiti

"15ATV" pa cumenza su operacionnan den verano, den asociacion cu NBC.

Opera pa empresanan local y profesional den e area televisivo, 15ATV lo transmiti via Cable-TV di Aruba for di

facilidadnan moderno cu ta den construccion na Royal Plaza. ATV lo provee un mezcla di programanan di noticia local, entretenimento y deporte conhuntamente cu e line-up di NBC.

Station Director y General Manager, Tom Pietersz, a declara na DIARIO: "E formato di 15ATV lo ta algo unico den Caribe. Nos programacion local manera noticia y deporte lo ta na Papiamento,

mientras cu e line-up tan popular di NBC cu e Arubianonan ta mira den numbernan creciente, lo continua na Ingles." DIARIO a comprende cu productornan local tambe lo tin e oportunidad di cumpra ora durante henter e dia di transmision.

15ATV lo contrata algun di e mihor talentonan cu Aruba ta posee den e ramo di telecomunicacion pa yena e posicionnan di productor, escritor, camarografo, editornan di videotape y ingenieronan. Den e proximo simannan, 15ATV lo cumenza cu audicionnan pa candidato pa e posicionnan di Presentador di Noticia y reporteronan pa su show di noticia diario.

Director di Programacion, Victor Winklaar Jr. ta remarca cu "e staf hoben y agresivo di 15ATV ta ansioso pa tuma ventaha di e oportunidad existente den e industria di comunicacion creciente di Aruba".

Recientemente e ehecutivonan di 15ATV di Management y Programming a atende e convencion di National Association of Television Executives (NATPE) na Las Vegas. Durante nan bishita na NATPE, ehecutivonan di 15ATV a reuni cu e representantenan di NBC pa firma e acuerdo di licencia, cual ta duna 15ATV e derecho exclusivo di transmiti e programacion di NBC pa Aruba.

NBC tin un historia di 58 aña brindando noticia y entretenimento di calidad. Den encuesta tras encuesta, NBC ta sigui na prome lugar como e canal cu e programanan di mihor calidad. Televidentenan ta asocia na programanan favorito cu NBC, como cu NBC tin un imagen di calidad.

Director di Programacion di 15ATV, Winklaar, ta sigui bisa: "15ATV lo mantene su mes na e mesun standard halto cu a mantene NBC y su shownan Friends, ER, Dateline y NBC Nightly News with Tom Brokaw na e top di e ratingnan di television.

Segun Tom Pietersz, e meta di 15ATV ta "pa provee noticia y entretenimento door y pa pueblo Arubano y pa haci 15ATV Aruba su canal NBC envez di NBC su canal Arubano.

PRONTO!

